

Upendo Huponya Majeraha Mengi

Wapenzi, na mpendane; kwa kuwa pendo latoka kwa Mungu, na kila appendaye amezaliwa na Mungu, naye anamjua Mungu—**1 Yohana 4:7.**

Katika mtazamo wa Kikristo, upendo ni nguvu. Nguvu za kiakili na kiroho zinahusishwa katika kanuni hii. Upendo safi una ufanisi maalum wa kufanya mema na hauwezi kufanya cho chote isipokuwa wema. Unazuia mifarakano na taabu na kuleta furaha ya kweli. Utajiri mara nyingi una mvuto wa upotovu na uharibifu; nguvu ina uwezo wa kuumiza; lakini ukweli na wema ni rasilimali za upendo safi.

Mtu mwenye amani na Mungu na wanadamu wenzake hawezi kufanywa kuwa duni. Husuda haiwezi kuwepo moyoni mwake; hisia mbaya haiwezi kuwapo humo; chuki haiwezi kuwepo. Moyo unaopatana na Mungu umeinuliwa juu ya kero na majaribu ya maisha haya.

Kile ambacho shetani hukiotisha moyoni—husuda, wivu, hisia mbaya, maneno mabaya, kukosa subira, chuki, ubinafsi, kutamani na ubatili—lazima ving'olewe. Ikiwa mambo haya mabaya yanaruhusiwa kubakia nafsini, yatazaa matunda ambayo kwayo wengi watanajisiwa. Cha kusikitisha, ni watu wengi jinsi gani wanakuza mimea ya sumu kali, ambayo huua matunda ya thamani ya upendo na kuinajisi nafsi!

Upendo unaoweza kuponya ni ule tu unaotiririka kutoka katika moyo wa Yesu. Ni yule tu ambaye upendo huo unatiririka ndani yake, kama vile utomvu katika mti au damu katika mwili, anayeweza kuirejesha nafsi iliyojeruhiwa.

Viwakilishi vya upendo vina nguvu ya ajabu, kwa maana ni vitakatifu. Jawabu la upole “ligeuzalo hasira,” upendo ambao “huvumilia, na wenye fadhili,” upendo ule ambao “husitiri wingi wa dhambi”—laiti tungejifunza somo hapa, maisha yetu yangekuwa yamebarikiwa na nguvu ya uponyaji jinsi gani! Maisha yangebadiilishwa na duniani kungekuwa na mfanano na mwonjo wa mbinguni!